

LECTIO

Primeira leitura: Joel 2, 12-18

Joel mak provavelmente amlulik-profeta ida, ne'eb'e moris iha temple, depoizde eziliu. Fiél ba servisu iha Maormak nia Uman, nia hanorin povu, ne'ebé hasoru hela hamlaha boot tanba gafañotu sira nia invazaun (1, 2-2, 10), ba orasaun no ba konversaun. Kultu iha templu mós para tiha (1, 13.16). Prote Joel, ne'ebé hatene lee sinál sira tempu nian, haklaken kona-ba «Na'i nia loron» ne'ebé besik daudaun, no konvida povu ba jejún, ba harohan no ba peniténsia (2, 12.15-17). «Imi nakfilak an bá», profeta hakilar. Povu ne'ebé fila kotuk ba Maromak, tenke fila fali nia fuan ba Nia, no hahú fali kultu iha templu, kultu auténtiku ida, ne'ebé hatudu konversaun interiór. Povu bele fila fali ba Maromak tanba Nia mizerikordiozu (v. 13), no bele muda ideia no fila fali ba kotuk (v. 14).

Domin sinseru ba Maromak, fiar konsistente, no esperansa ne'ebé sai orasaun korál no penitente, sei fó ba profeta no amlulik sira kondisaun sira atu husu Maromak nia laran-sadia ba ninia povu.

Segunda leitura: 2 Coríntios 5, 20 – 6,2

«Imi hadame malu an ho Maromak», ne'e mak Paulo nia apelu. Rekonsiliasuan ka hadame malu buat id abele akontese, tanba ida-ne'e mak Aman nia hakaran, hatudu iha nia Oan nia obra redentora no iha Espíritu nia kbiit ne'ebé apoia apóstolu sira-nia serbisu. V. 21 mak pontu aas testu nian, basá haklaken Maromak nia juízo hasoru salan no ninia domin boot ba sala-na'in sira, hodi la poupa nia Oan nia moris (kf. Rm 5, 8; 8, 32). Kristu lori iha nia an mundu nia salan no kasu ho ninia isin rasik. Nune'e, ita bele halo sai ita-nian, ninia justisa-santidade. Ida Inosente ka Sala-laek sai salan atu ita bele sai Maromak nia justisa. No, oras-ne'e mak tempu favoravel, di'ak, atu aproveita grasa ida-ne'e; mai ita husik ita-nia an rekonsilia (katallássein) ho Maromak. Liafuan gregu ida-ne'e hatudu transformasaun iha ita-nia relasaun ho Maromak, ne'ebé lori ita atu moris, la'ós ona ba an rasik, maibé ba Ida ne'ebé mate no moris hi'as mai ita (w. 14s.), ita bele sai fali kriasaun foun iha Kristu (5, 18).

Evanjellu: Mateus 6, 1-6.16-18

Jezús husu ba ninia dixípulu sira justisa ida boot liu eskrina no farizeu sira-nian, maski sira halo obra sira hanesan ho farizeu sira-nian: «Imi matan moris atu la halo imi-nia hahalok sira iha ema sira nia oin, atu sira haree». Nia aplika prinsípiu ida-ne'e ba prátika relijioza ruma ninia tempu nian: esmola, jejún no orasaun. Presiza matan moris ba motivasaun sira ne'ebé lori ita atu fô esmola, harohan, hadera an ka jejún, basá haree buat ne'ebé subar, sentimentu sira kle'an liu ema nia fuan nian. Maibé se ita buka relasaun íntima no pesoál ho Nia, komuñau ho Nia, ita sei simu rekompensa. Se ita la halo hahalok ka obra di'ak ho intensaun loos, ita “hypokrito”, katak, ema halo teatru ka komediante no ema laran aat, tuir uzu ebraiku liafuan ida-ne'e nian.

MEDITATIO

Liturjia Liafuan fó orientasaun loloos atu moris hodi fó fuan Kuarezma ida-ne'e, tempu favoravel grasa nian, loron salvasaun nian. Peniténsia no arrepentimentu la'ós dalan tristeza nian, depresaun nian, maibé dalan roman no ksolok nian, tanba, se lori ita atu rekoñese lia-loos, nia mós sei loke ita ba domin no mizerikórdia Maromak nian.

Profeta hodi Maromak nia naran, konvida povu atu halo dalan esperansa nian, hodi halo peniténsia; apóstolu sira simu husi Maromak ministériu rekonsiliasaun nian; Igreja tenik liafoun di'ak: «Ne'e mak tempu favoravel – ne'e mak loron salvasaun nian» (2 Cor 6, 2). Ho Maromka nia povu tomak, ita simu konvite atu halo dalan fila-fali nian ba Na'i, hadame malu ho Na'i, fó ba Kristu okaziaun atu lori ita-nia slan sira iha ninia kabaas, tanba Nia de'it mak bele kasu salan sira.

Hodi hafoun an iha domin, ita bele moris ho ksolok no ho konfiansa iha Maromak, ita Aman nia prezensa, hodi kumpre ho hariak an buat hotu ne'ebé fó ksolok ba Nia no útil ba maun-alin sira. No iha Aman nia prezensa, iha ita-nia íntimu, garante ksolok loos.

Jezús, iha evanjellu, hatudu mai ita, sá loos mak tenke sai ita-nia atitude bainhira ita pratika obra sira peniténsia nian (esmolam orasaun, jejún), no insiste iha intensaun loos, ne'ebé garante intimidade ho Mana. Atitude ida-ne'e no mak Jezús rasik hatudu iha ninia liafuan no hahalok sira. Imi la halo buat di'ak atu ema admira imi. Ita bele hetan tentasaun atu halo di'ak atu ema seluk admira ita. Maibé atitude ida-ne'e, husi parte ida, taka ita iha an rasik, no husi parte seluk lori ita sai husi an rasik, hodi sai dependente ba ema seluk nia opiniaun sira.